

吳文節公遺集

吳文節公遺集卷二十八目錄

奏議

海塘沖缺摺

搶築海塘片

堵合海塘缺口摺

塘工大概情形片

搶護塘工摺

堵合續塌塘工摺

新堵各工穩固片

吳文節公遺集卷二十八

男養原謹編

奏議

海塘沖缺摺

奏爲恭報海塘石工沖成缺口一段潮水湧注現在趕  
緊設法搶護並請

旨將

臣

交部治罪恭摺

奏祈

聖鑒事竊照浙省海塘爲本省杭嘉湖及蘇省之蘇松  
常鎮七郡田廬保障攸關緊要年來因南岸漲沙日漲

日寬海面逼窄潮勢趨撲北岸塘工處處喫重每當山  
水下注與潮相激上下流溜直刷塘根力量尤爲猛烈  
本年五月十六七及二十二二十一等日晝夜大雨如  
注上游山水大發西防廳屬律呂調陽四字號勢坐微  
灣江流逼近於二十四日申刻將律呂字號柴土刷空  
並將相連之調陽雲騰致雨字號柴土一併帶去該道  
廳等正在設法搶護詎石塘椿木年久霉朽卽於戌刻  
坍去呂字號石塘十一丈又於二十五日巳刻以後陸  
續坍去五十餘丈臣聞報卽親赴工次督飭該道廳等  
將已倒之石塘趕做子塘後身原有之附土本屬單薄

亦晝夜加柴加土加楮爲擁護之計詎六月朔汛較大  
初一二日子塘間有過水處隨時鑲護尙未掣動初三  
日午潮尤大於未刻忽將所築呂字號子塘衝開一段  
並後身椿柴附土沖去潮勢洶湧下注口門坍塌寬十餘  
丈人力無從著手臣正駐工次日擊情形心膽俱碎卽  
委員分投各處購覓船隻滿裝塊石俟潮平時於口門  
鑿沈一面嚴飭該廳備等多備柴土一俟稍可著手卽  
趕做柴壩以冀潮水不致內灌至臣未能先事豫防致  
石塘有倒塌之處又未能搶護平穩致衝缺過水下游  
各處田廬恐不免受害實屬咎無可辭應請

旨將臣交部治罪再臣於決口進水時親履塘上往來

督飭正值風雨交加塘邊泥滑草鬆臣失足落水幸救

得生惟浸受寒溼精神恍惚腰腿酸痛不能親自駐工

督辦焦急萬分除杭嘉湖道常川在工搶辦外臣復飭

藩臬兩司輪替到工稽查照料臣稍可支持立即馳赴

工次督率辦理合併陳明所有海塘石工倒坍缺口進

水緣由事關七郡田廬理合恭摺馳

奏伏乞

皇上聖鑒訓示謹

奏道光三十年六月初四日奏奉

硃批另有旨此

搶築海塘片

再西防廳屬律呂調陽字號塘工於上月二十四五日因山水與潮汛衝擊將石塘坍卸數十丈趕卽搶做柴埽土塘業已完整旋於本月初三日朔汛大潮將呂字號土塘衝開缺口十餘丈過水當經臣恭摺馳

奏在案一面與司道等督飭工員趕做柴壩設法搶護初四初五兩日潮勢正大人力無從著手以致口門又陸續刷寬十餘丈當卽多備柴埽廣集人夫晝夜搶築冀乘初十後朔汛潮小期內趕緊堵合無如時屆伏汛

晝夜兩潮勢仍洶湧將缺口處跌成深潭探量三丈有餘臣督令該工員等於東西兩頭分起挂纜下埽進占現已於東西兩頭各做成柴壩四五丈六七丈不等而中間尙有十餘丈口門未能堵合緣潮來時人夫不能立足無從措手早潮一退卽趕緊施工不過兩三時許晚潮卽來勢須歇乎夜間晚潮退後亦復如是現在又值望汛大潮潮來較猛潮退較遲下埽加椿稍有不及穩固之處旋被刷去臣心急如焚力疾親赴工次嚴督在工員弁人夫等多用麻袋裝土拋填深處一面多備柴埽乘空搶做得寸則寸得尺則尺並將兩頭已做之

工加緊保護務期於二十日外望汎湖小期內一律堵  
合以資抵禦其毘聯之雲騰致雨四號柴埽附土前經  
大溜刷帶一空石塘因年久椿朽縉裂情形亦重現仍  
外護內托不遺餘力漏夜搶做埽壩冀保無虞至此次  
缺口進水飭據地方官查探惟附近之仁和海甯二州  
縣沿河地方間有低窪村莊數處因潮漲河溢田廬被  
淹已飭該州縣妥爲安撫下游各遠處因缺口尙不甚  
寬進水無多未致漫溢爲害除俟趕緊堵合另行馳  
奏外所有現在辦理情形謹先附片奏

聞伏乞

聖鑒謹

奏道光三十年六月十四日奏奉

硃批另有旨欽此

堵合海塘缺口摺

奏爲海塘缺口現已堵合並下游州縣尙無因潮內灌  
被淹受害之處恭摺馳

奏仰祈

聖鑒事竊照杭州西防廳屬律呂調陽等字號塘工前  
於五月二十四五等日因山水與潮汛衝擊致將石塘  
坍卸六十餘丈趕卽搶做柴埽土塘擁護嗣於六月初

三日朔汛大潮又將所做呂字號土塘十餘丈冲缺過  
水當經臣恭摺馳

奏一面與司道等督飭工員趕緊搶堵詎正值大汛期  
內潮勢猛烈人力無從著手以致口門續又刷寬缺口  
處復跌成深潭周圍約寬百丈均深至三丈有奇下埽  
施工實多棘手經臣力疾親赴工次嚴督工員兵夫等  
設法分頭進占復飭工員多備柴料購地取土廣雇人  
夫並令藩司汪本銓臬司黃宗漢輪替赴工暨添委糧  
道胡元博常駐工次幫同杭嘉湖道舒化民分駐東西  
兩頭督辦又札調署東防同知唐光照來工率同在工

員弁兵夫乘此二十日以後望汎潮小期內漏夜搶築  
臣仍不時親駐工次嚴行督催每早晚潮一過卽晝夜  
施功不遺餘力茲於二十四五兩日幸將沖缺土塘口  
門一律堵合密釘長大排椿並於外面加拋塊石以禦  
潮勢內做托壩以資擁護正在繕摺

奏報間於本月二十六日奉到道光三十年六月十六  
日奉

上諭吳文鎔奏海塘石工被水沖缺一摺著該撫督同  
藩臬嚴飭道廳等員趕緊設法搶護毋得再有疎虞以  
致潮水內灌一面查明下游州縣有無被淹處所迅卽

據實由驛具奏吳文鎔於轄境要工未能先事豫防著  
先行交部嚴加議處等因欽此臣跪讀之下不勝悚感  
伏查此次缺口進水臣前經飭據地方官查探惟附近  
之仁和海甯二州縣沿河地方間有低窪村莊數處因  
潮漲河溢田廬被淹已飭該州縣妥爲安撫下游各遠  
處因缺口進水無多未致漫溢爲害臣前奏塘工趕辦  
情形片內業已陳明

聖鑒茲欽奉前因臣復加確查其附近之仁和海甯二  
州縣前因潮水驟注沿河低窪田廬間有被淹現已消  
退至下游各州縣並無因潮水內灌被淹受害之處現

仍嚴飭各工員加緊保護毋致再有疎虞並一面採購白石大料俟八月大汛後卽趕緊建復石塘以資保衛至杭嘉湖道舒化民暨該廳備馬椿齡夏德風等先事疎防均有應得之咎當經臣責令將決口工程趕緊搶堵再行察核功過能否相抵該道暨該廳備等亦自知愧懼一月以來奔馳於烈日泥淖中一息不敢稍懈茲幸仰賴

皇上福庇決口業已堵合可否將該道及該廳備等免其開叅之處出自

皇上逾格鴻施再此次搶堵險工一切購料購土添雇

民夫及委員分投採辦麻袋裝土拋填價買民船鑿沈  
購運上游塊石均須迅速湊手與尋常估辦工程有間  
需費稍多臣不敢拘泥遲誤卽經飭司於塘工生息項  
下隨時籌借給發現在尙未據該廳備開報實在用數  
除俟核明確數另行具

奏辦理外所有呂字號土塘衝開缺口現已堵合並下  
游各州縣未經被淹緣由謹繕摺馳

奏仰慰

宸廑伏乞

皇上聖鑒訓示謹

奏道光三十年六月二十八日奏奉

硃批另有旨欽此

塘工大概情形片

再浙省仁和海甯二州縣境內塘工綿長幾及二百里分隸東西兩防同知巡視修防查東防石塘於道光十四年間曾經大修一次西防石塘悉係雍正乾隆年間修建歷年既久椿木多已彫朽全恃埽工戢土內外夾持近因南岸漲沙日漲日寬海面逼窄潮勢趨撲北岸上游山水亦迤向北岸刷汕塘根以致塘工處處喫重在東塘有坦水工段尙可抵禦其柴埽工段暨西塘通

塘均係柴埽埽根一經搜齧則全埽傾卸所有行路溝槽附土亦隨之而去以致顯露石塘塘底椿木又年久易折此年來險工疊出之實情也從前埽根賴有護沙凡限外之工上面潑損趕緊加鑲復可保住卽限內之工工員稍加賠補亦易爲力年來先從埽根受傷一經沖刷卽深至一二丈不等凡限外之工不獨不能僅辦加鑲卽照拆建新建之工價辦理先須一二丈深之水底施功糜費已多工竣後外無護沙仍時虞傾卸而限內之工亦往往賠不勝賠至石塘以內積年取土填工現在近塘數十丈悉成深坎塘身益形孤立而取土

愈遠功費愈多此又年來工程棘手之實情也且歲修經費有常勢難一律興辦不能不將險中尤險之工間段擇修其實次險之工未及轉瞬已成尤險而間段修理左右兩頭往往不能聯屬一氣每以忽險之舊工累及甫修之新工臣屢次往來塘上與道廳等察驗情形實係如此卽詢之士民老兵所言亦均相同現在除決口處所業經堵合外其餘限內險工嚴責承辦之員趕緊賠補限外刻不可緩之險工正復不少瞬屆八月大汛臣目擊情形實爲膽寒心悸現與司道等熟商先擇其尤險者約千餘丈加派委員分段認辦以期急資抵

禦惟通塘八九千丈之堵工若非通盤籌計大加修葺則尤險者尙未辦竣次險者又成尤險顧此失彼終非長策且其坐灣當衝之處必須多做盤頭數座多購塊石拋填護住塘根庶可穩固雖目前費用較多而通工聯絡根脚保固工程自可持久此後數年間之歲修轉可節省以將來可省之歲修提作目前之工用於帑項尙無所損惟庫款支絀籌墊亦非易辦理尤須得人其應如何籌款作何估辦之處容<sub>臣</sub>與司道等悉心籌商俟商酌定議另行奏請

訓示遵行所有現籌塘工大概情形謹先附片奏

聞伏乞

聖鑒訓示謹

奏道光三十年六月二十八日奏奉

硃批另有旨欽此

搶護塘工摺

奏爲西防廳屬調字號土塘迤東埽工復於本月朔汛  
大潮被冲塌開現在趕緊設法搶護恭摺

奏祈

聖鑒事竊照杭州西防廳屬律呂調陽等字號石塘前  
因被湖冲坍六十餘丈當卽搶做柴埽土塘擁護嗣因

所做呂字號土塘決缺十餘丈經臣恭摺馳

奏一面與司道等督飭搶堵至六月二十四五兩日將  
沖缺土塘口門一律堵合二十六七等日早晚兩潮暨  
二十八日早潮察看所堵口門並無損動堪資抵禦經  
臣於六月二十八日恭摺

奏覆仍親駐工次督飭各工員加緊培護並於口門池  
東調陽字號已做埽工之外一律加拋塊石已出水面  
後面接築柴土托壩正在趕辦間適二十八日亥刻潮  
來較大二十九日寅刻西南風大作風力挾潮沖擊塘  
身所有新堵口門完整無損惟池東埽工被沖蟄陷間

有透水之處經該工員等趕緊搶鑲至二十九日巳刻潮來已將該處埽工併力鑲高不致漫溢復飭將通工一律加高加厚三十日午潮勢極洶湧幸各段土塘仍無潑損潮平後連夜搶做計又加高至四五尺釘立排椿詎至子刻排椿甫經釘完潮汛卽至較前更形浩大潮頭一過浪湧如山迤東埽面始則過水繼復掀翻頃刻之間奔騰漫溢人力難施將調字號已成埽工塌開十丈有奇潮勢下注臣目擊情形心膽俱碎現在嚴飭該工員等將兩頭工程加緊鑲護一面多備柴埽料物一俟潮平稍可著手立卽併力施工設法堵合俾湖水

不致內灌惟此數日內正值秋朔大汛潮勢猛烈能否  
不致刷寬尙不可必臣惟有督率各工員竭盡人力設  
法保護至前次堵合之缺口現在並無蝨損其下游地  
方臣於決口後卽委員前往查探仍止仁和海甯境內  
附近之低窪村莊間有被淹下游遠處並無漫溢合並  
陳明所有調字號土塘埽工復被沖塌現在設法搶護  
緣由謹恭摺馳

奏伏乞

皇上聖鑒訓示謹

奏道光三十年七月初二日奏奉

身文節公遺集卷二十一  
硃批另有旨欽此

堵合續塌塘工摺

奏爲海塘續塌堵工業已堵合並將新做托壩趕緊鑲護情形恭摺

奏祈

聖鑒事竊照杭州西防廳屬所做調字號已成埽工前

於本月朔汛大潮復被沖塌十丈有奇當經臣恭摺馳

奏一面親駐工次督飭各工員購備料物督率兵夫漏

夜施工分頭搶築業於初十日晚潮以前將沖塌口門

堵合鐵釘長大排椿潮來時已一律加高並未漫蓋仍

於外面加拋塊石後面趕做托壩藉資擁護是晚風勢大作塘上柴棚席廠多被捲拔兵夫間有壓傷十一日風雨交加潮勢愈旺潮退後察看新堵口門幸皆完固無損至十二日亥刻晚潮勢更洶湧口門池東埽工間有斜陷透水之處後身新做托壩亦有矧陷臣卽嚴飭趕緊加鑲柴土加釘椿木立時搶護完整惟現值秋汛以後潮勢日大該處新做柴埽土塘縣長六十餘丈外面石工業已坍卸全賴一綫土塘資爲捍衛前次缺口未合潮來時得於缺處灌洩分勢堵合以後潮勢無可分洩搏擊塘身未免處處喫重時覺可虞臣惟有督飭

各工員不遺餘力將前塘後托晝夜加功務期一律高寬足資抵禦一面採購石料俟八月大汛以後趕緊建復石塘俾資鞏固所有調字號沖塌埽工業已堵合並新做托壩加鑲保護緣由理合恭摺具

奏伏乞

皇上聖鑒再臣前因海塘缺口事關七郡田廬深恐下游受害是以由驛馳

奏今兩次缺口查明下游遠處並無漫溢前已據實奏聞故此次堵合及搶鑲情形未由驛遞合並陳明謹奏道光三十年七月十三日奏奉

硃批知道了仍應妥慎防護毋稍疎懈欽此

新堵各工穩固片

再西防廳屬十四堡初次被沖缺口之呂字號土塘及  
續被沖塌之調字號埽工前經隨時搶築堵合經臣先  
後專摺奏

聞一面督飭各工員多備料物鑲高加厚竭力保護並  
於律呂調陽四號裏面普律加鑲托壩外面加築護埽  
以禦秋潮旺汛現查新堵各工歷過七月望汛暨八月  
朔汛大潮俱尙平穩間有蟄陷低窪之處均卽立時加  
土加柴搶做完固並無掣動其裏面托壩現亦一律趕

做齊全惟外面托築護埽因時值秋汛晝夜兩潮勢極  
洶湧下埽加椿稍有不及穩固之處旋即被沖刷去施  
工較難尙未完竣臣現飭該工員等嚴督兵夫漏夜搶  
做以資捍衛所有新堵各工歷過七月望汛暨八月朔  
汛大潮現俱穩固緣由謹附片奏慰  
宸廑伏乞

聖鑒謹

奏道光三十年八月十二日奏奉  
硃批知道了欽此

吳文節公遺集卷二十九目錄

奏議

猝遭風雨各屬被淹並塘工續沖缺口摺

通籌修建塘工摺

海塘續坍口門堵合摺

吳文節公遺集卷二十九

男養原謹編

奏議

猝遭風雨各屬被淹並塘工續沖缺口摺

奏爲浙省地方猝遭烈風大雨水勢陡漲各屬低鄉田廬被淹現在委員分投查勘並海塘十四堡雲騰二號石工亦因山水大下續又沖坍一段缺口進水趕緊設法搶堵緣由恭摺

奏祈

聖鑒事竊照浙省地方自六月初旬以後晴日較多幾

成旱象迨七月下旬始得透雨中晚二禾藉獲滋培正在揚花吐秀再得月餘即可陸續收成詎自本月十三日子刻起至十四日亥刻止接連兩晝夜傾盆大雨連綿如注無一息之停加以西北風猛烈非常臣署百十年大樹爲之吹折江河水勢陡漲丈餘低鄉田廬悉被淹浸省外各屬現據報到者如杭州府之富陽新城餘杭嘉興府之嘉興秀水海鹽桐鄉石門湖州府之烏程歸安德清武康紹興府之山陰會稽蕭山諸暨嵊縣等縣或江河漫溢或山水下注民間廬舍坍塌禾稻偃撲水中情形大半相同此外各州縣有無似此情形尙未

據報到臣身心不安寢食幾廢率同僚屬虔赴各廟泣  
禱一面飭司委員分赴各屬確切查勘並令該地方官  
督飭農佃設法疏通自十五日後天已晴霽水勢能否  
迅速消退被淹田禾能否挽救不成重災容俟查明實  
在情形另行分別

奏辦至杭州西防廳屬海塘前於五月間因律呂調陽  
四號石工被冲坍卸致將相連之雲騰致雨等號石塘  
外面柴土一併帶去石塘間有歪閃裂縫情形危險會  
於前摺陳明經臣飭令工員趕緊搶做外埽加工倍料  
堅實高厚已於八月朔汛前一律完竣方冀足資抵禦

其石塘後身原有之戩土亦經加柴加土竭力擁護奈自十三四等日大雨以後上游山水奔騰下注直趨北岸搜刷塘根至十五日戌刻雲騰二號外埽忽然矧陷十餘丈石塘裂處情形亦重臣聞報卽於十六日辰刻馳抵工次察看因石塘底椿本朽外失護埽已先於丑刻將雲字號石塘坍倒八丈餘尙未掣通過水其地東雲騰二號數十丈外埽刷卸一空臣正在督飭該道廳等於未倒石塘外面趕緊搶做子塘一道保護塘根詎正值八月望汛大潮午末潮來浪湧如山兼之江漲湍急搏擊洄漩頃刻之間雲騰二號石塘又被冲坍十餘

丈水勢奔騰旁注致將後面戢土托壩沖缺過水臣目  
覩心悸人力無從下手現在惟嚴飭該工員等將兩頭  
加謹裹護多備柴埽料物趕緊將土塘口門搶築堵合  
免致潮水內灌至前次堵合之呂字號調字號土塘托  
壩現俱穩固並無掣動合併陳明所有浙省猝被風雨  
田禾受傷及海塘續坍情形臣謹恭摺奏  
聞伏乞

皇上聖鑒謹

奏道光三十年八月十九日奏奉

硃批另有旨欽此

通籌修建塘工摺

奏爲遵

旨通籌海塘大局議請擇要修建埽工盤頭加拋塊石俾資聯絡恭摺覆

奏並懇

恩借款動支以濟工需仰祈

聖鑒事竊照浙省海塘爲本省杭嘉湖及蘇省之蘇松常鎮七郡田廬保障最關緊要本年夏間西防廳屬十四堡呂調等號海塘決口臣在工督率搶堵往來塘工目擊各段情形危險居多非將通塘工程大加興辦不

能鞏固當與司道等籌議商辦並將籌辦大概情形附片奏

聞欽奉

上諭吳文鎔另片奏現籌塘工大概情形其應如何遴委賢能籌款估辦之處著該撫等迅卽通盤籌畫悉心妥議具奏等因欽此仰見

聖主慎重海防保衛民生無微不至臣跪讀之下欽感

難名伏查東西兩防塘工綏長約二百里東防石塘塘根有坦水者居多其無坦水工段及西防通工石塘均係於外面鑲做柴埽以資擁護而西防石塘建修年久

塘底椿木率多彫朽全恃外面埽工裏面戩土內外夾持近因南岸漲沙日寬潮勢被東北趨加以山水下注埽根節被搜刷多已受傷塘裏戩土又因年深月久日漸單薄若籌久遠長策似須將年久石塘分別拆建塘後戩土統行培厚塘外柴埽普律新修庶可堅固永久惟工程浩大費用綦繁當此庫項支絀之際勢不能籌此鉅款興此大工然目視工多危險不能不權其緩急於節省之中求保全之策當與司道等欽遵籌畫並前詣各段周歷察看計惟有將通塘柴埽於歲修額款外擇要多修使新舊各工得資聯絡再於頂沖處所修建

盤頭以挑潮勢加拋塊石以禦山水查通塘柴埽計一萬丈有奇限內之工計有三千餘丈其限外尤險要工一千七百餘丈已於六月分沙水情形摺內

奏明動額設歲修經費及石塘生息奏濟估辦並添派委員杭捕同知張玉藻紹興府同知沈維鈺候補運副祝維則候補知縣袁惠疇龔振麟等會同該廳備分段興修外現查限外險要急須興辦柴埽仍約有一千餘丈必須同時趕修俾大局得以藉資聯絡搏節核計需例加工料銀八萬餘兩又擇要修建盤頭加拋塊石約需銀二三萬兩再六月間十四堡呂字號塘工缺口

搶辦鑲堵一切工費經臣飭司於石塘生息項下籌借給發曾於前摺陳明嗣因先後趕築子塘添做護埽托壩加拋塊石並調字號土塘續被沖塌搶築堵合工鉅費繁石塘生息項下已動支三萬餘兩湊濟另案埽工歲額不敷之用僅存銀二萬一千餘兩全行撥用外計尙不敷銀六萬餘兩又八月間雲騰二號塘工續又沖缺現在購料添夫連日搶堵所費尙雖定數約計亦需銀四萬餘兩其先後坍塌之律呂調陽雲騰六號石塘共計已及百餘丈連兩頭欹斜縉裂應行拆去重修石工統共約長一百二三十丈照例價核估需銀五萬餘

兩以上各項大共約需銀二十六七萬兩均應籌款支給第

國家經費有常際此庫款未充何敢率行請撥而工關緊要支發又不能刻延臣與該司道再四籌商惟有先行借款修辦仍就塘工應動款內通融歸補溯查道光十四年

欽差臨浙查辦塘工添備東塘修費案內曾經奏奉諭旨准於本省捐監項下每年提銀五萬兩存貯藩庫備添東塘歲修之用嗣於十九年間

奏明提撥一次自二十年以後東塘修費均就歲額支

動並未續提其原提監餉尙有支剩銀六千餘兩現在西塘工用緊迫應請卽就東塘添備之項爲西塘協濟之需惟司庫捐監銀兩厯係遵奉部文撥解現在僅收存正銀三萬一千餘兩連前提支剩之六千餘兩儘數支用外其餘均應籌欸暫借據藩司查有東塘改復坦水備用欸內原存銀七萬餘兩又塘工本案扣存減平銀二萬九千餘兩又現辦柴埽各工扣收錢本銀二萬餘兩應請一併借撥此外不敷之欸藩庫實已無可動借應請在於運庫本年鹽課項下借撥銀十二萬兩以濟工需俟監餉續有收存卽自本年爲始照每年提銀

五萬兩之數撥補原借各款儻經此次籌辦以後將來歲修能有節省亦卽儘先歸補庶要工得以趕辦而帑項不至虛糜據該司道等核議具詳請

奏前來臣覆加體核委俱實在情形竊思先後沖塌缺口既須急切搶堵其坍塌之律呂調陽雲騰等號石塘地處頂衝亦必乘冬汛期內趕緊建復而現在籌修之柴埽盤頭等項新工又必須及時辦理免致多閱一汛多被續坍益形喫重是以節經臣隨時檄飭將籌借藩庫各款陸續動支現復遴委候補道趙連標臨海縣知縣仲孫樊暨該廳備等將擬辦新工及建復石塘事宜

分設認辦籌動運庫銀兩督令趕緊領項購料興工理  
合據實具

奏仰懇

皇上天恩俯念海塘工程險要准將各款借撥動用按  
年歸補俾要工得以及時無誤以重海防而衛民生至  
動用銀兩如建復石塘修建埽工盤頭購拋塊石將來  
均按例加工料銀數循例

題銷其節次搶辦險工用過銀兩均經杭嘉湖道舒化  
民駐工親身經理將來仍由臣按照實用確數覈實報  
銷不使稍有浮冒請借之銀如有多餘另行報撥除節

該司道迅將應辦各工段落丈尺銀數照例開具清單  
另請具奏外所有臣遵

旨通籌海塘大局並懇

恩借款修辦要工緣由理合恭摺具

奏伏乞

皇上聖鑒訓示謹

奏道光三十年六月初三日奏奉

硃批該部議奏欽此

海塘續坍口門堵合摺

奏爲海塘第三次續坍口門業已堵合恭摺奏祈

聖鑒事竊照杭州西防廳屬十四堡雲騰二號海塘前  
因八月十三四等日大雨以後上游山水奔騰下注加  
以八月望汎大潮洶湧致將石塘續又沖坍二十餘丈  
並將後面土塘沖缺過水當經臣彙同各屬地方被淹  
情形恭摺奏

聞一面嚴飭該工員等多備柴埽料物令杭嘉湖道舒  
化民駐工督辦臣復不時親赴工次督催弁兵並添雇  
人夫一俟潮過無分晝夜下埽加椿併力施功茲於九  
月初十日將土塘口門搶築堵合並趕於九月望汎前  
鑿高幫寬現已歷過十八九等日大汎早晚潮汐新工

俱無潑損臣仍嚴飭工員隨時鑲土加柴妥慎防護一面採購石料將此次雲騰字號及前次律呂調陽四號次第建復並將前摺

奏請籌辦各險要處所柴埽等工趕緊興辦以資保衛至前二次堵合之呂調字號土塘托壩現亦穩固並無掣動合併陳明所有海塘第三次續埽雲騰一號口門業已堵合緣由理合恭摺奏

聞伏乞

皇上聖鑒謹

奏道光三十年九月二十日奏奉

殊批另有旨欽此

吳文節公遺集卷三十目錄

奏議

清查彌補章程摺

籌補款內錢文抵放兵餉片

添設塘工廳員摺

建復石塘情形摺

吳文節公遺集卷三十

男養原謹編

奏議

清查彌補章程摺

奏爲清查各屬挪數現已分任核明應請按數著追並  
籌議節省彌補章程以重倉庫而收實效恭摺

奏祈

聖鑒事竊照浙江省清查上年經

欽差

臣

季芝昌會同

臣

查明倉庫挪缺大數籌議追賠

章程先後具

奏並分年分縣造具四柱清冊咨部行令將應追銀數分任造冊呈核臣當查分任追數應以冊報存墊爲憑而冊報存墊尤當以原接交代爲據雖交代係統計存墊不分正附但其存正存附之欸確有可查卽應存應抵之銀無從掩飾隨將交代先行勒限算結一面嚴飭各縣按任造齊並督飭局員悉心稽核其正欸之錯列附貯者逐爲釐正其濫欸之混列攤抵者概行剔開統計各屬共一千一百七十八任實應追正欸銀三百六十五萬二千五百四十五兩八分五釐三毫四絲三忽九微現已分任造具清冊並將各任抵欸賠欸於冊內

無不逐加確核另行酌定現在支欸業已減折扣欸卽  
可稍輕是節省業有明徵養廉已可提補又查各縣批  
解地漕應需銀匠傾耗經解川費及一切公用每縣多  
寡不等現在核實酌減總計兩項每年約可提補銀三  
萬餘兩又查存留役食等項俱係由縣坐支司道府各  
書紙飯等項亦多由縣津貼此二欸俱屬折錢給發現  
在銀價增昂較前逾倍循舊折給核有盈餘各屬併計  
每年約可提補錢八萬串如援照現屆官墊民欠難限  
以二十五年爲率共可提補銀七十五萬兩提補錢二  
百萬串卽補限比追限爲稍寬而補欸必較追欸爲著

實惟以籌補之數核計應存之銀如概予補完則追數多而補數較少通省挪缺之項勢難全數補清如按成分補則追數多者補數亦多虧缺較鉅之員轉得寬其議處臣與司道悉心酌議籌定章程應請將籌補之數卽以該員完繳之數爲準如該員名下初限應繳銀數能完至五成者其餘五成卽予豁免歸入籌補完至三成者亦准其籌補三成其未完四成銀欸應請酌展一年著落完繳不准再予籌補餘卽照此遞推如初限屆滿不能完足成數者請卽照章查辦此外陞任及候補各員亦照此一律辦理查原議定章仿照安徽省上屆章

程本屬加緊四年現在各省清查福建山東等省統限八年俱已

奏明咨部覆准在案今議將業已完足成數者量予加展仍較各省章程並無寬縱且以追賠籌補相輔而行則籌補非爲濫施卽追賠易收成效黽勉自勵者予以減追而觀感必思共奮抗延不繳者仍行參辦而法網無可倖逃是於追補之中卽寓勸懲之法况節省不由攤派不致藉詞以啟新虧提扣悉有實銀無待虛墊而成懸欸如此變通辦理於追賠原案並不相妨而彌補章程益歸實在矣據布政使汪本銓杭嘉湖道舒化民

會詳請

奏前來臣復核無異除將分任各冊及歸補章程開具條欵另行咨部外理合恭摺具

奏伏乞

皇上聖鑒訓示謹

奏道光三十年十月三十日奏奉  
硃批戶部妥議具奏欵此

籌補欵內錢文抵放兵餉片

再浙省此次清查現經籌議章程分別追補另摺具奏在案查籌補欵內書飯及存留役食兩項每年節省

錢八萬串因原款本係給錢故能得有盈餘是其所節省者本係錢文並非銀款現既酌提歸補必應悉數提解方免別事挪移第令易銀解司則傾鎔難免耗費若將原錢解繳則運費更屬不貲自應於歸補之中熟籌濟用之法查浙省滿綠各營兵餉向搭局錢一成嘉湖各營與省城一水可通盤運尙易溫處等標距省至千里以外營員領解餉錢水陸運腳均須賠貼祇以向例如是雖不敢遽議更張究未嘗不以領運錢文較爲苦累至浙省鼓鑄局錢銅斤採自滇省近年以來滇省所產銅質迥不如前一經鎔化倍多折耗每屆辦銅一次

往返必須數年承辦之員又因原價水腳例價不敷向來議給津貼每次數以萬計均於廉內捐扣各州縣既以津貼爲賠累該委員復以差遠爲畏途是以浙省之鼓鑄本形掣肘局內存錢亦因之未能充裕臣與司道悉心籌議若以前項節省歸補之款濟局錢搭放兵餉之需一轉移間而二者即可交相爲濟查向例搭放局錢一千扣錢本銀一兩今仍以一千之錢作抵一兩之用於

帑本既無虧折卽以扣存錢本之銀作爲歸補虧挪之項於籌補更覺充餘且以該州縣應解錢文卽令就地

支放營餉在各屬無事易解之煩而銀卽扣存司庫則補苴非徒托空言在各營不須領運之費而錢可就近關支卽弁兵亦樂於從事上以籌備

國計下卽以體卹兵艱而於清查提補之法亦大有裨益據藩司汪本銓杭嘉湖道舒化民會詳請

奏前來相應請

旨勅部議覆如蒙

俞允請自咸豐元年夏餉爲始凡應搭錢數由司預期行知責成各府提齊經放以免營縣別生輻輳此後浙省鼓鑄局錢自可漸臻充足如有可以變通辦理之處

容臣隨時酌量情形再行

奏辦再清查案內挪缺附貯各款銀兩現與正項一併  
造冊咨部追繳查附貯雖非正項可比但其中亦有應  
解部款現擬節省錢文搭放兵餉其扣存錢本每年卽  
可提補銀八萬兩合養廉解費兩項併計共可提補銀  
一十一萬兩應請以一十萬兩歸補正項以一萬兩撥  
補附貯以期庫項益臻完善理合附片陳明伏乞

聖鑒訓示謹

奏道光三十年十月三十日奏奉

硃批該部議奏欽此

添設塘工廳員摺

奏爲西塘工段縣長緊要擬請添設廳員分司修防並  
於丞倅員缺分別裁改以免冗濫恭摺

奏祈

聖鑒事竊照浙省仁和海甯二州縣境內海塘爲本省  
杭嘉湖及蘇省之蘇松常鎮七郡田廬保障縣長約二  
百里向分東西兩塘設立同知二員守備一員專司修  
防其經管東塘者爲東塘海防同知經管西塘者爲西  
塘海防同知守備則兼任東西兩防協同巡視辦理歲  
修近年以來因南岸沙塗日漲日寬東湖北趨而西塘

情形非受海潮刷潑卽當山水頂沖較東塘尤爲喫重兼之通塘皆柴埽工段較東塘埽工數亦逾倍現已由臣通籌大局

奏請借款將險要柴埽盤頭分別修建以期聯絡鞏固此後必須責成工員將各段柴埽勤加察視一有潑損立即補修鑲護庶不致愈潑愈寬傾圮掀動坍及石工第該塘自烏龍廟一堡西映字號起至老鹽倉二十四堡因字號止共計柴埽工長九千二百餘丈西塘同知一員巡視雖周深恐顧此失彼必得於西塘所轄要隘處所添設廳員責令分管方免貽誤臣與司道等悉心

籌畫查西塘同知經管柴埽工九千餘丈盤頭九座內  
烏龍廟自五堡以西塘外漲沙縣遠工程尙屬穩固其  
自五堡以東起至潮神廟止計柴埽工長三千餘丈盤  
頭五座俱屬險要茲請自烏龍廟起至潮神廟止仍歸  
西塘海防同知經管自潮神廟起至老鹽倉止計柴埽  
工長三千餘丈盤頭四座均屬險要工程該處居通塘  
之中應新設中塘海防同知一員劃歸經管定爲衝繁  
難海疆要缺在外陞調三年俸滿查明或修防妥固辦  
事勤幹或循分防守辦事中平均照東西兩塘同知之  
例查辦其辦工兵弁仍協同海防營守備督率辦理所

有守備原辦中塘內工段照舊委修毋庸更張惟添設員缺例應裁缺抵換現於通省丞倅中逐一體察查有台州府通判本係無字選缺職司鹽務水利事務頗簡堪以裁汰其原管鹽務等事卽歸併台州府知府兼管以免曠誤第所添係調缺所裁係屬選缺應另改調爲選查有湖州府烏鎮同知本係衝繁中缺嗣因分駐烏鎮總理捕務改爲衝繁難要缺在外調補專司督捕巡緝近來事務不繁堪以改爲衝難中缺歸部銓選似此因時制宜量爲變通庶海塘防護得人而於銓政仍無妨礙據藩司汪本銓臬司黃宗漢杭嘉湖道舒化民會

詳詩

奏前來合無仰懇

天恩俯念海塘緊要准予新設杭州府中塘海防同知一員作爲衝繁難海疆要缺在外陞調以重修防並將台州府無字選缺通判裁汰將湖州府分駐烏鎮衝繁難要缺同知改爲衝難中缺歸部銓選以符銓政如蒙俞允所添中塘同知正當新設之初一應規模皆屬經始非強幹之員弗克勝任容臣另行揀員陞調所有員下廉俸卽照通判支給其額設典吏書役工食等項悉照台州通判之式毋庸增減又台州府通判曹紹櫛前

因病故開缺歸部銓選今員缺議裁將來部選之人到浙照例留省儘先補用至湖州府烏鎮同知前已將於潛縣知縣曾積堂陞補應俟引

見准陞後再飭赴任其員下廉俸吏缺書役工食等項悉循其舊至新設同知應鑄印信及一應未盡事宜統俟准到部覆再行分別查辦所有西塘工段縣長緊要據請添設廳員分司修防緣由理合會同閩浙總督

臣

劉韻珂恭摺具

奏伏乞

皇上聖鑒勅部議覆施行謹

奏道光三十年十月三十日奏奉

硃批該部議奏欽此

建復石塘情形摺

再西防廳屬十四堡律呂調陽雲騰等號石塘前於本年五月暨八月間先後被潮汐山水沖擊坍塌卸均經督率工員將坍塌卸口門隨時搶做子塘柴壩堵合保護節次奏

聞在案現屆冬令潮汎較平所有坍塌石塘急須乘時建復臣卽親赴工次與道廳等員相度察看探量該塘舊址業已刷成深潭石料均坍塌海底無從撈揀若仍

照舊於石塘東西兩頭取直接築非但外無欄護每日  
潮汐湧漲難以施工且底深石硠釘樁亦不能牢必得  
移向裏面緊靠新築埽托後身稍作彎環弓背形式兩  
頭仍與舊石塘鬪筍釘錫方爲妥善將來止須於石塘  
後填築餞土一道卽無庸另做外埽工費亦可節省統  
計建復石塘連增築東西兩雁翅共工長一百一十丈  
因該管西防同知馬椿齡應辦新舊柴埽要工尙多未  
竣勢難駐工專辦石塘查有署東防同知唐光照辦事  
敏練該同知本任所轄東塘現在並無緊要工程堪以  
委令辦理除檄飭遵照趕辦並將工程丈尺估計銀數

循例另行開單具

奏外所有前項坍卸石塘現在建復情形及委員趕辦緣由謹先附片奏

聞伏乞

聖鑒謹

奏道光三十年十月三十日奏奉

硃批知道了欽此